

Jahresbericht vor Trachtegruppe Gurzele 2014

Z Jahr 2014 het für Trachtegruppe mit der Vorstandssitzig am 8. Januar agfange. D Houptversammlig vorbereite, das git gäng rächt vieu Arbeit.

Die erschti Singprob hi mir am 15. Januar gha. Mir hi no nöii Lieder z lehre wo Kommission letscht Jahr usegläse het. O z Repertoire uffrüsche für e nächscht Uftritt ändi Februar isch agseit.

Nachemne turbulänte Jahr im 13äni hei mir du ab am März wieder as neuu Tanzleiterpaar gfunge. Sit denn leite us Daniela und d'Ernst Rohrer us Utzigen mit viu Freud u Gedult. Zyt drvor het Tanzleitere Heidi Beyler us Burgistein überbrügget. Ihre möchte mir a dere Steu ganz, ganz härzlech für ihre toll Isatz „Merci“ säge. Bi ihre het ou dr Humor immer as Plätzli gha.

Am 25. u 26. Januar sie sächs Tanzfroue nach Lyss ads Kurswuchenänd ga neuu Tänz lehre.

D Houptversammlig am 31. Januar im KBZ Seftige isch guet über Bühni gange. Üse abträtend Präsident het das im Griff gha nach so mängem Jahr. I wet am Hans-Jörg Schneider a dere Steu no mau härzlech Danke für si Isatz für Trachtegruppe.

D Kathrin u der Ernst Siegenthaler si am Samstag der 8. Februar z Huttwil aus Veterane gehrt worde. Das si 25 Jahr Zughörigkeit zum BKJV. Mir gratuliere no mau ganz härzlech. Es het natürlech e rächt grossi Delegation vom Chörli die zwöi uf Huttwil begleitet. Mir hei e luschtige u zfridene Abe gha.

Am Sunntig isch du Delegierteversammlig vom BKJV z Huttwil gsi. O hie isch z Chörli mit ere Delegation verträte gsi.

Am 23. Februar isch üses Motto gsi: Dem Mitmenschen Freude zu machen ist doch das Beste, was man auf der Welt tun kann. I gloube das isch us glunge wo mir im Pflege- u Autersheim hi tanzet u gsunge. Es isch schön wem e dene Lüt am Sunntig chli cha abwächslig i ihre Autag bringe.

Donnschtig der 6. März isch z Bouwling spiele agsit gsi. Mir hi uf drei Bahne chönne spiele zu je sächs Persone. Ds Hildi u d Ruth hei aus Zuschouer teilgnoh. Nach zwene Durchgäng isch d Annarös aus Sieger fescht gschtange. Sie het du zur Daniela wo zweit isch gsi gsit, gäu d Grossmüettere hi ne müesse zige wie das git. Es isch e glungene Abe gsi.

D Rosmarie u der Markus Schneider hi z Chörli am 8. März a der Jubiläums Delegierteversammlig vom EJV, verträte z Wauwil.

Delegierteversammlung Region Mittelland het das Jahr am 14. März z`Murri stattfunge. Dert si Kathrin Hirschi u Silvia Beyeler drbi gsy.

Jetzt isch es arbeitsintensivs Wucheänd agsit gsi. Mir hi am 30. März z Trachte Zmorge düregführt. D Lüt si i schare cho u his gnosse. Es isch aus grüehmt worde, vor Dekoration über z Ässe, Singe u d Ungerhautig vor Musig.

A dere Steu danke i aune ganz hätzlich füre Isatz, es isch es iigschpieuts Team u funktioniert beschtens. O d Gescht gschpüre das!

Am Samschtig der 5. April hi mir am Konzärt vor Blaskapäue Jantar wieder törfe d Feschtwirtschaft führe. Es isch gäng e schöne Abe mit der rassige Musig.

Gässe u Trunke isch rächt viue worde, eifach vom Gebäck wo mir i däm Jahr z erschmau hi abote isch no viue fürig gsi. Da mir aber aui gärn süesses hi, isch du das zum ne günschtige Pris a üser Lüt verhouft worde.

O hie es grosses merci für z häufe!

O i däm Jahr het üses Tanzleiterpaar wieder a drüne Tanze mitenand teilgno. Dert wärde die bestehende Tänz ume ufgrüsch.

Z`Regionauträge im April het Trachtegruppe Riggisberg z` Rügeggisberg düre geführt. Das isch ganz ä luschtige Abe gsy. B`sungersch z Heidi Beyeler het üs immer wieder zum lache bracht. Mir vo üsere Gruppe hei dert aber ou sehr viue tanzet.

Z`Bott z`Thun isch auso wüekli äs Erläbniss gsy. Scho mau wües so nach isch gsy u wiu aus ou so schön gstautet isch worde. Die ganzi Anlage isch zum Thema Thun u Thunersee dekoriert worde. Dä Alass isch am 27. April gsy.

Daniela u Ernst Rohrer hei am 24. Mai am festleche Tanzabe im Casino z' Bern teilgno.

Am Fritig der 20. Juni isch veiechli es Tschüpeli cho Brätle i d Chüeweid. Ds Wätter isch guet gsi, eifach chli chaut isch es du worde. Mir hi aber e gmütliche Abe verbrunge! Mir si mit vieune feine Dessär verwöhnt worde. Merci vieu mau de Spänder!

O am Walter Fahrni, Adolf Fuss u Hans-Jörg Schneider es grosses merci für zwäg zmache u z führe das mir üses Fleisch uf schöner Gluet hi chönne brätle.

Vom 4. Bis 6. Juli het z Davos ds Eidgenössische Jodlerfescht statt gfunge. Mir hi aus Verein nid Teilgno aber z Hanny Burri mit em Terzett u d Rosmarie u der Markus Schneider mit der Auphorngruppe si z Davos ga mitmache. Z Terzett u d Auphorngruppe hi beidi es sehr gut gmacht. Mir gratuliere a dere Steu no mau ganz hätzlech!

Am 5. Ouguscht het z Chörli nach de Summerferie wieder mit Üebe agfange. Mir hi no grad e chli müesse gas gäh, si mir doch am 16. Ouguschte bir Barbara u Stefan Hänni – Zehnder zur Hochzyt iglade gsi u hi d Barbara mit em Lied Hochzytstag wöue überrasche.

Ir Chiuche z Kirchdorf hi mir, wie es sich ghört ame Hochzyt i der Bärnertracht, zwü Lieder gsunge. Es isch e sehr schöni ufs Brutpaar bezogeni Trouig gsi.

Aschliessend si mir zum Aperu u o zum Nachtässe iglade gsi. O i der Feschthütte hi mir no paar Lieder gsunge.

Bim Feschthütte uf- u abboue hi d Manne chönne häufe u bim Salatbuffet het e Gruppe Froue chönne häufe Schöpfe, was mir natürlech gärn hi gmacht.

Barbara u Stefan mir danke ganz hätzlech, dass mir dä Tag mit öich hi dörfe verbringe.

D Wuche druf het d Martina u der Adrian Schenkel Hochzyt gha i der Chiuche z Kirchdorf. Reust's si dert iglade gsi. Z Chörli het sich bereit erklärt bi dere Trouig cho z Lied das ch nur Liebi si z singe.

Mir hi mit dere Überraschig grossi Fröid bereitet. Danke vieu mau das dir bereit sit gsi das mit zhäufe.

Am letschte Mänti im August isch üsi Tanzüebig bir Silvia Beyeler z' Schwarzenburg gsy, Dr Höhepunkt vom Abe isch natürlech z Brätle gsy. Aber wis im Summer 2014 ja bekannt isch hets ou a däm Abe wieder eis grägnat u isch kaut gsy. Aber das het üsi Stimmig nit betrüebt. Hei du haut leider nit dusse chönne sy u drum hei mir dä Abe

im Garage verbracht. Zwüschem Räge hets du doch ou no chli glängt für dusse chli z'Tanze. Nachbare si zwar du nitso nache cho. Premiere het Denise Bühlmann a däm Abe gha, de sie isch z'erschte Mau Grillmeistere gsy. Bis uf z' Fleisch vor Elisabeth Fankhauser wo chli schwarz isch worde het sie's rächt guät im Griff gha. Danke ihre für d' Unterstützig. Ä Abe wo üsi Kammeradschaft bestimmt ume gsterkt het u bestimmt no lang nit vergässe geiht.

U scho isch es Septämber u ds Gürbetaler Jodlerträffe isch agseit. Hüür hets z Zytröseli Seftige düregführt. Mir hi grad nach em Chinderchörli am Namittag dörfe singe. D Lieder du liebe Mönsch u Freu di Härz. I gloube es isch e glungene Uftritt gsi. Bi wunderschönem Wätter het du der Gsamthor u d Aschprache dusse chönne düregführt wärde.

Aschliessend isch der gmütlich Teil cho. Es isch vieu gsunge worde! U gwüss hi si üs du no fasch müsse hi jage. I finges schön we so aui wo drumum hocke oder stöh häufe mitsinge, so das mir ei grossi Jodlerfamilie si.

27. u 28. Septämber si mir uf Reise! Üses Zieu isch Braunwald im Glarnerland.

Bi wunderschönem Herbstwätter isch e Gruppe vo 32 Persone am Samschtig Morge gschtartet mit Engloch Reise gägem Glarnerland zue. Z erschte Zieu isch der Klöntalersee gsi. Das isch de aber äng gsi dür das Täli hingere u de si ersch no aupt Guschti entgäge cho wieu si Aupabfahrt hi gha. Aber üse Chauffeur isch ganz ruhig bliebe u het das ohni Problem gmeischeret. Mir hi e schöne gmütliche Ufenthaut gha, bim Wandere, Pic-Nice oder fein Ässe im Restaurant.

Schneiders hi sogar d Auphorn derbi gha. Das het ganz schön tönt, sogar mit Echo.

Tanja u d Chrischtine hi du o probiert däm Auphorn es paar Tön z entlocke. Wo du aber Hans-Ueli het wöue probiere ob är e Ton use bringt, hets ihm du der Nabubruch usestrückt vor luter blase.

Der Bahnhof Linthal isch üses nächschte Zieu gsi. Mir si mit der Bärgbahn opsi Braunwald zue. Nächär isch du d Suechi nach üsem Hotäu losgange. Mi het düre Waud ueche müesse u gäng guet uf d Wägwisser luege. Mir his du ömu gfunge u si hi üs scho erwartet.

Schöni Zimmer, es herrlechs Nachtässe, nätti Bedienig u es feins z Morge, was wot me no meh?

Nume em Chauffeur sis Bett isch zäme gheit, dä het du nid so guet gschlafe wi mir.

Zum Nachtässe isch du o d Barbara itrudlet. Si isch ga spalier stah zure Kollegin is Toggeburg u isch üs när mit em Zug nachegreist.

Am Sunntigmittag si mir wieder i Car igschtige u witer greist Richtung Einsidle wo üse nächscht Haut isch planet gsi.

Vo Einsidle si mir übere Brünig uf Brienz cho. Im Restaurant Kreuz hi si üsers vorbschteute z Nacht schnäu parat gha.

Zwüschtige hi mir o gäng öppe es Lied gsunge.

Mit foue Büch si mir du no de Seene na gäge Gurzele zue gfahre.

Es isch e schöni, gmütliche Reis zänd gange. Daderzue het aber o üse agnähm, ruhig Chauffeur vieu bitreit

.

Üsi Tanzleitig het am 26. Oktober am Tanzleiter Träffer z' Gümligen teilgnoe.

Ärntedankgottesdienscht, a däm Sunntig 26. Oktober darf z Chörli i d Chiuche ga singe. I däm Jahr hi mir mit der Organistin Christine Gysler abgmacht für zäme öppis probiere zmache. D Christine het üs du uf der Handorgele begleitet zum Lied B'hüet üs Gott der Chüjerstand. Bim Gebät hi mir zersch säuber gsunge u när het d Christine z Lied no mau gschpiet uf der Orgele u Tanja het z Überjützi derzue gsunge. Das het ihm ganz Ghünerhutet. Es isch eifach Ärdeschön gsi!

Es grosses merci der Christine Gisler u der Tanja u natürlech öich aune. I gloube mir hei es sehr grosses Wau..... hingerlah a däm Sunntig.

Käthi Nydegger isch am 30. Oktober 70zgi worde. Am Abe vorhär wo mir Prob hi gha si mir du am zäni vom Sunn u der Schwigertochter mit eme feine grosszügige Znüni uberrascht worde. Käthi danke no inisch vieu, vieu mau!

Am 20. Novämber si ganz fliessig Tombolaprise baschtlet worde.

Adväntsgschteck, Cherzegläsli u Schtärne hets gäh. Die wo Schtärne gmachr hi si veiechli am chnorze gsi.

Es isch aber e zfridene Abe gsi u es het doch über 30 Preise für i Tombola gäh.

27. u 29. Novämber u 4. u 6. Dezämber isch Houptprob u Ungerhautigsabe Datum.

D Houptprob isch relativ ribigslos über Bühni gange.

Es git haut o gäng no vieu Infos witer zgäh, aber das ghört derzue, dass de o aui wüsse wenn, wo u was.

So u jetz si mir i de Schtartlöcher gsi für die drei Ungerhautigsabede.

Mir hi jede Abe der Saau vou Bsuecher gha. Üses Programm mit singe, tanze, Auphorn, Musig u Theater spricht haut vieu verschiedeneni Lüt a u ds Echo isch o sehr positiv usgfaue.

Es isch mire Miinig nah o aune Gruppe guet glunge u dSchtimmig isch locker u zfriede gsi.

O wes happig isch u e chrampf für aui, die drei Abe dürre zführe, so gits ihm doch o öppis zrugg we dBsuecher s'gniesse u rühme wis ne gfaue het!

De machts o Früd dür zganze Jahr ga z Üebe uf üse Vereinshöhepunkt häre. Oder hit dirs nid o so?

I wet a dere Schteu ganz bsungers der Theatergruppe danke, aber o am Auphornduo Schneider u Öich aune für dä gross Isatz.

D Auterswiehnachte hi mir am 10. Dezämber düregführt.

D schüler vor Basisschufe Nord si cho es Theaterli ufführe u d Frou Pfarrer Fabretti het e Bärndütschi Gschicht vor Marta Wild vorgläse.

Nähr hets obligate Paschtetli gäh.

Im zweite Teu hi mir du no gsunge u tanzet.

Es si doch wieder inisch chli meh Seniore a die Wiehnachtsfiir cho aus di letschte Jahr.

Ou i däm Jahr chöi mir ume uf viu schöni Erläbniss z' rugg luege. Äs isch eifach so schön wie toll üsi Kameradschaft immer isch. Alli si immer fürenang da. Merci a dere Steu ar ganze Gruppe. Mir Tanzfroue wete aber ou dir Daniela u dir Ernst ganz, ganz härzlech Merci säge für di enormi Gedud wo dir geng für üs ufbringet. Mir freuie üs geng wieder ufe Mäntig für ids Tanze törffe zcho. Mir si stouz so kompetänti Tanzleiter dörfe z ha. Merci euich zwöine ou ganz härzlech!

Bi Künzi's z Wattwil hi mir mit em Autjahrshöck das 2014i la usklinge.

Agmäudet si 42 Persone gsi, leider hi du 9 Persone wäge Chrankhiet müesse absäge.

Wie gäng si mir vor Regina u Johann mit Hieuf vor Madeleine verwöhnt worde.

Das Päcklispiu wo d Kathrin Peter mit üs het gmacht isch luschtig gsi u het Abwächslig gäh. Danke viuu mau!

Mir si gar nid viuu zum singe u musige cho, wieu Zyt isch im Flug verbi gange. Es tuet guet chönne zäme zsi u sech la zverwöhne ohni säuber müesse zschaffe, grad nach dene Abede vom Dezämber.

I däm Jahr 2014 isch z Chörli 46x zäme cho, dadervo si d HV, z Trachte z Morge, 8 Ufritte gsi u zusätzlech z Jantarkonzärt u z Hochyt vo Schenkels.

I wett a dere Schteu üser Dirigäntin am Hanny Burri ganz härzlech danke für di grossi u kompetänti Arbeit dür z ganze Jahr. Mir schetzes sehr, dass mir di aus Dirigäntin dörfe ha.

Tanzgruppe isch 33x zäme cho, dadervo si d HV, z Trachte z Morge, z Autersheim u 4 Uftritte gsi u zusätzlech z Jantarkonzärt.

O der Daniela u em Ernst Rohrer wet i ganz härzlech danke für ihre gross u kompetänt Isatz. Es isch schön hit dir üsi Gruppe grettet u ghöret o zu üs.

Danke wet i aber o Öich aune für e guet Bsuech vo de Probe u füre Isatz dür zganze Jahr für Trachtegruppe!

Der Lieder- u Theaterkommission u de Rächngsrevisore danke i o ganz härzlech für Ihri Arbeit!

U zletscht wet i es grosses Merci a mini Vorstandslüt witergäh!

Es isch schön mit Öich zäme das Vereinsschiff zführe.

Für z nöie Vereinsjahr wünsche i Öich aune vieli schöni, gmüetlechi u zfriedeni Schtunge mit der Trachtegruppe u vorauem gueti Gsundheit.

Gurzele im Jäner 2015

Öii Presidäntin

Marianne Reust